

朱子大全集

第六
函八冊

晦菴先生朱文公別集卷四

與一維那

以下見陳利用編大同集

老親比苦重聽服上人藥遂良已上人索詩久廢無
次聊復此殊不佳也紹興癸酉九月晦日紫陽朱仲
晦書

當年事幽討結友窮名山曾逢許斧子去採玉芝還歸來坐空
房神清骨毛寒起視塵中人一見了肺肝撥囊出刀圭生死毫
釐間相逢瘴海秋遺我黃金丹高堂得聽瑩班衣有餘歡謝師
無言說舌井生波瀾

上廣文

廣文何事創棲居收拾家藏理蠹餘尚有簡編充棟宇擬陳車
馬次門閭移床客去邀明月送酒人來異遞書縱使清貧無長

物猶勝四壁似相如

考試感事戲作

海邑三年吏勤勞不爲身但令官事了從遣黠兒嗔

題米倉壁

度量無私本至公寸心貪得意何窮若教老子莊周見剖斗除衡付一空

題安隱壁

征車少憇林間寺試問南枝開未開日暮天寒無酒飲不須空喚莫愁來

題梵天方丈壁

輪盡王租生理微野僧行乞暮還歸山空日落無鐘鼓只有禪

常蚯蚓飛

五月五日海上遇風雨作

秋風吹雨滿征衫
陸走川行兩不堪
塵事索人心事遠
濯纓何必在江潭

兩絕句送順之南歸

門前三徑長蒿萊
愧予殷懃千里來
校罷遺書却歸去
此心元是不曾灰

幾年江海事幽尋
偏與雲僧話此心
今日肯來論舊學
歲寒猶恐雪霜侵

寄陳講師

以下見別編臨江集

聞道山中客年來
鬢欲皤靜便三徑
小貧覺一身多且喜
詩無病從教睡作魔
故人今領衆猶覺
慙嗟

別陳講師

幾年勞夢想今日慰登臨況入珠蘭室又聞金玉音與君連夜語盡我一生心此外成華髮無因得重尋

登閣阜山

疊疊層巒鎖閼宮我來舊地訪靈踪葛仙去後無丹竈弟子今成白髮翁

一派泠泠臺下水半空漠漠嶺頭雲祖師成道冲天去只有無窮受籙人

送單應之往閣山

杖頭挑月入煙蘿城郭塵埃奈爾何若到名山高著眼洞天深處異人多

回首名山我舊遊曾將風袂浮丘如何不及臺邊水長向山前山後留

送李道士歸玉笥三首

偶隨雲去伴雲歸
笑指清都在翠微
爲我中間留一榻
他年去著薜蘿衣

玉笥山連都水坑
拂雲樓殿對崢嶸
君歸後夜無餘事
卧聽寒泉落澗聲

莫惜臨行酒一杯
看君上馬古城隈
相望兩地無多遠
頻寄音書與鴈來

題赤城觀

落日空山秋氣清
泠泠古木亂蟬鳴
仙人一去鶴不返
劍客重來丹已成
靜對竹爐烟縷直
細看月窟桂華生
此身舊有蓬瀛約
玉簡歸來問姓名

尤溪縣學觀大閣

見尤川志及
南溪祠堂志

令尹絃歌不下堂叱嗟層觀麗扶桑朱薨碧瓦臨無地散帙投
壺樂未央得意溪山供徙倚忘情魚鳥共徜徉應觀物我同根
處剖破藩籬卽大方

十月上休日遊卧龍玉淵三峽用山谷驚鹿要須野學

盟鷗本願秋江分韻得鷗字

按大全集但有秋字韻不載此鷗字韻馮本有之或

云先生命門人所作而後不用或又云得兩韻而集軼之以下見南康集

匡廬霜天後不見雲氣浮本葉紅已疎山顏轉清幽向聞有絕
絳乃在卧龍湫及此遂一往幸無烟景愁躋攀欲其溪泉石固
所求況有百尺崖噴雪飛寒流幽琴自回抱直下鳴青璆便可
洗我耳枕石忘所憂精神共虛廓方物皆悠悠所恨非獨往不
能恣夷猶仰難雲間鶴俯羨谷中鷗先生先我來結屋陽岡頭
虛名代忠武滅迹慕巢由是間頗足居不田亦平曠野人種畝

橘崖蜜易歲收西源有老翁卷舌藏戈矛似學辟世士乃欲邀
聖丘先生且憮然但作一月留俟我有決計宅時卜從游

次周師溫游書堂韻兼簡坐上諸同志

疇昔因來行水餘依依唯認昔人居新堂已幸經重構舊事難
追更特書所願絃歌聞十室休誇文字賦三都同來況有濂溪
齋心印相傳儘未疎

西源居士斲寄秋蘭小詩爲謝

知有幽芳近水開故攀危磴斲蒼苔却憐病客空齋冷帶雨和
烟遠寄來

至樂齋記

以下見大同集

盤谷傳公客於泉州城東之佛寺間卽其寓舍之西偏治一室
達其南北以爲軒窗極爽塏左右圖史自六經而下百家諸子

史氏之記籍與夫騷人墨客之文章外至浮屠老子之書荒虛
譎詭該諧小說種植方藥卜相博奕之數皆以列置無外求者
公於是日俯仰盤礴於其間繙羣書而誦之蚤夜不厭人蓋莫
窺其所用心而公自以爲天下之樂無易此者故嘗取歐陽子
之詩以名其室曰至樂之齋而顧謂某曰爲我記之某辭謝不
敏不嫻於文字且不敢爲庸人誦說而况敢爲是耶旣公命之
不置某不得終辭乃承命而退推公意所以然者而書之曰人
之所以神明其德應物而不窮者心而已古之君子自其始學
則盡力於洒掃應對進退之間而內事其心旣久且熟矣則心
平而氣和冲融暢適與物無際其觀於一事物之變蓋無往
而非吾樂也而况載籍所傳上超羲農下至于茲其間聖賢之
行事問學之源奧是非得失理亂存亡廢興之故包括籠絡靡

不畢具苟涉其辭義而心必契焉則其可樂而玩也豈不亦至矣哉惟世之學者或不足以知此而勞於記誦佔畢之間以爲事是以語之至者旣扞格而不入於心惟其粗厲而不平者感而入焉則其間勃然而鬪而怒矣亦何樂之云哉某惟歐陽子之詩與公之所以取焉者蓋其指畧如此因序次以爲公齋記云紹興二十八年閏月癸卯新安朱某記

恕齋記

溫陵陳君養正讀書之堂同郡呂君少衛榜之曰恕齋而陳君有謁於予曰願有記也予故以是往而觀焉則其垣屋位置與夫几案圖書花藥之列無不合其宜得其所蓋飾不過侈而簡不至陋起居便適而視聽無邪真若幽人逸士之居者雖予亦樂之將爲之記而問其作興端原則曰此吾居第之東榮也凡

茲棟宇皆亾所收於其舊惟鑿牕牖以候明晦焉而爲是室也
此亦何所書記顧吾之所以望於夫子者願聞恕之說而盡心
焉耳予聞之懷然曰子之志則善矣而非予所敢當也予不佞
少從先生長者遊嘗竊聞夫恕之說以爲不過推已之心以及
人而已勉而行之又以爲無難也然克己之功未加而蔽於有
我之私勝則非此未嘗不病焉而何敢易言之以重得罪於聖
人之門也用此辭謝不敢有者幾累月陳君請之不置而呂君
亦以爲言予不得以終辭也則歷誦前語而謂之曰以是爲記
足以不沒乎爲齋之實而亦可見強恕之難矣惟呂君幸以爲
不悖於所以名之意則庶乎其施也二君皆曰善遂書寘齋屋
壁間以視陳君且自警也紹興二十七年十二月五日新安朱

鄉飲舍菜二先師祝文

見大同集

敢昭告于先師堯國公先師鄒國公朝廷舉遺興禮使郡縣三
歲一行鄉飲酒之禮以迺其士子俾莫不精白以祇承明詔某
爲縣長吏敢不以時奉行卽事之初以禮舍菜于先聖至聖文
宣王以公等配

赦後祭

祝文

見南康集

乃季秋辛未天子有事于合宮樂備禮成放祭澤于宇內凡諸
祀壇宇之有功於民者悉詔有司潔嚴報享惟王聖德神功賴
及萬世至今天下生人有一日之安者皆王之德也邦有彝典
敢或不虔仰惟明靈尙其昭鑒

祭芸谷文

先生之曾孫沂藏錄藁

維乾道五年歲次己丑三月丁巳朔十有四日庚午廸功郎差

克樞密院編修官朱某敢以香茶酒果之奠託友人林用中致祭于亡友林君師魯之靈惟昔先君與芸齋先生遊而吾師魯又不鄙某愚嘗不遠數百里過我潭溪之上蓋將從容講學以共進於斯道也顧以姻喪欲畱不可自是一別遂訣終天嗚呼痛哉志長命短如師魯之才之敏乃不克究其業而止於斯吾徒二三子失良友之助能不隕涕相弔而况高堂垂白又何以堪此愁苦耶某形疲道遠不能往哭香茗之奠以累同志遵承先志收拾遺文并以囑之庶可無憾嗟嗟師魯尚克鑒此而享之耶嗚呼哀哉

祭文

先生之孫濬家藏

維淳熙二年歲次丙申九月癸卯朔十六日戊午宣敎郎朱某敢以酒肴之奠告於太夫人氏靈筵曰我昔貧病掩關自

休有來自東而辱與遊既往既來十年頓久義篤情親謂我昆
友我相其流以必其源曰是世德抑母之賢惟母之賢聘于名
族婉德清門慈祥雍睦成其二子學古行修左右致孝色思其
柔顧我者誰曰實其季適騫以翔遽以憂躋我聞其憂驚歎失
聲孰勤斯誨弗伴其榮往吊不能且悲且愧千里緘辭相此一
酌嗚呼哀哉

芸齋遺文跋

先生之曾孫沂藏錄藁

先君子志尚高潔不妄與人交蓋嘗避地福之古田得芸齋先
生林公而與之遊愛其學識行誼有以過人而惜其且將湮沒
無聞於世也及仕於朝爲之延譽甚力然竟不及試用識者恨
之某自幼侍立先君子之側則已聞先生爲人之大畧近乃得
其臨終手筆數十百言戒其家治喪無用浮屠法者讀之然後

知先生所學之純所養之固見於死生之際者又如此宜乎先君子之所甚厚而不忘也三復至言惟念先志追慕哽絕不知所言既而先生之子魯山不遠數百里過某於潭溪之上道語舊故泫然久之因謂某曰先人絕筆之書將刻諸石以傳學者子爲我識之某惟先生於此特示人以變俗由禮之大端耳若夫反躬格物以明先王制作之本使其情文義數粲然大備盡祛千載習俗之陋而壹反之於正豈不猶有望於後人哉師魯篤志好學其果能進此以成先生之志則豈惟某與一二友朋之願抑先君子實寵嘉之因敬書以附其後云乾道戊子四月丁酉新安朱熹敬書

書李巽伯所跋石鼓文後

先生之曾孫濟家藏

唐貞觀中吏部侍郎蘇易著論岐陽獵鼓引歐陽虞褚並稱

墨妙爲據三君體法爲世楷式賞好爲物軒輊在當時已爾
今其故蹟僅存隋珠和璧不足喻其珍也予避地來南一日
料檢行度得歧鼓及孔廟醴泉化度孟師丹州諸碑流徙之
餘偶無轂落爲之驚喜過望書其事以示子孫建炎己酉夏
鍾五日維人李處權異伯

余年十八九時邂逅李卿於衢守張紫微坐上二公皆一時名
勝揮塵論文意象超逸令人傾竦今觀此卷恍然若將復見其
人而追數歲月忽已四十寒暑矣不惟前輩零落殆盡而及見
之者亦無幾人可爲大息淳熙戊申五月旣望朱熹仲晦父書

跋訛傳龜山列子解後

先生之曾孫
主簿家藏

龜山之見二先生在元豐之初此書作於其前固不足怪跋語
則出於其後而有非所宜言者矣豈其後人有惜是書而不忍

棄者託爲是語以重之歟噫是書卽傳而其爲龜山之累也甚矣向見沈公雅說有此書初不敢信淳熙己酉夏將樂鄧綯爲寫寄來因得記其所疑于後且細讀跋語中用字下語多不中律令與龜山他文不類其僞妄不疑但不知何人所作耳七月三日熹書

跋郭忠恕說文字源

仙游洪震夫家藏

楊文公蘇文忠公皆言郭恕先尸解而逝今觀此卷非斯人之仙而誰仙耶淳熙癸卯晦翁

題折桂院行記

以下見南康集

始予至折桂院之西軒愛其江山之勝道人雲公爲予言此未足觀少上當益奇因道予行深竹中竹盡得太皐背負五老面直江湖東西數百里雲山煙水渺莽縈帶勝絕不可名狀乃規